



Die strydende kerk beweeg

Teks: Jesaja 54: 2

Die trek van Israel deur die woestyn is in menige opsig die beeld van die kerk hier op aarde, op pad na die beloofde erfenis en die nuwe Jerusalem. Dit is die tentwoning-tydperk, en tog tabernakel van God.

Die tent

Die tabernakel moes saam met God se volk deur die woestyn trek. Daar het God sy volk in besonder ontmoet. Dit was gemaak van doeke, want dit moes saam met die volk van plek tot plek trek. Dit moes maklik opgeslaan en weer afgebreek word. Altyd maar die voortgaande, tydelike, beweeglike. Dit was nie staties-permanent soos die tempel nie. Daar is opslaan, afbreek, verskuif, voortgaan. Daar is die gedurige verwisseling, omwisseling, afwisseling. Maar dit bly die ontmoetplek van God met sy volk. Die strydende kerk mag nie staties word nie. Dit moet voortgaan van geslag tot geslag – oor gewoontes, gebruike en kulture, deur verwisseling van jare en eeue heen.

Die tent moet oopstaan

Die tent moet voortgaan.

En dit moet wyd oopstaan.

"Want die kinders van die eensame (Israel in ballingskap) is meer as die kinders van die getroude" (Israel voor die ballingskap, vers 1), dit "sal nasies in besit neem" (vers 3).

Die tent moet wyd oopstaan, sodat God se volk uit alle tale, volke en nasies daar kan ingaan. Dat daar ruimte sal wees vir die verbondsnageslag van Abraham.

Die strydende kerk mag nie 'n afgeslote ruimte wees vir sekere groepe en individue en klieke en volke nie. Die mens mag nie eiewillige grense daarvoor vasstel nie. Dit mag nie deur die gees van afgeslotenheid beheers word nie. Dit moet 'n oop ruimte wees. Dit moet oopstaan na die wêreld toe, nie om die wêreld daarin toe te laat nie, maar om God se uitverkorenes daarin te ontvang, en om die jubellied van verlossing, die blye boodskap van God se verlossende genade in Christus daaruit te laat weerklink.

Want die kerk is:

- Getuie van God se genade in Christus
- Lig van die wêreld
- Sout van die aarde.

Dit moet oopstaan om met die jubellied van genade te nooi: *"Kom na My toe, almal wat vermoeid en belas is, en Ek sal julle rus gee"* (Matteus 11:28).

"o Almal wat dors het, kom na die waters" (Jesaja 55:1).

Anker stewig

Maar al staan die tent oop, al is daar onbeperkte ruimte – die tentpenne, die ankers moet stewig en vas wees.

God se Woord, die leer en die regering moet suiwer en vas gehandhaaf word.

Hoe groter die tent en hoe wyer dit gespan is, hoe vaster moet die penne geslaan word.

Saam met die beweeglikheid en die openheid van die kerk, moet daar tog die geankerdheid wees.

Die ruimte wat verskaf word, moet nie wees vir dwaalleer en sonde nie. Dit moet wees vir God se volk om Hom in vryheid te dien. Die beweeglikheid moet nie geleentheid wees vir ondergraving nie, maar om God te dien in die tyd waarin jy lewe.

Verhinder dit nie

Die kerk is God se volk.

Dit is God se werk.

Die kerk het sy roeping en opdrag van God gekry.

Verhinder dit nie deur skeurmakery, dwaalleer, sonde, mensgemaakte grense en bepalinge nie.

Verhinder nie dat God se beloftes in vervulling gaan deur die beweeglikheid staties te wil maak, die ruimte in te perk of die ankers los te maak nie.

Verhinder dit nie deur ampsbediening, sending of evangelisasie teë te staan, te dwarsboom of te kortwiek nie. God se verbondsvolk moet versamel word, want kyk Hy kom.

Verhinder dit nie.

AJ Coetsee

© 2013

www.christelikebiblioteek.co.za